

Tuesday, February 10, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



MINISTER INAUGURATES ANIMAL INSURANCE

AH & Vety Minister Pu C Lalsawivunga chuan vawiin khan ranvulhtute tan Animal Insurance a tlangzarh.

Planning & Programme Implementation Dept Committee Room-a hun hmanah hian Minister chuan, Insurance Company tam zawkin animal insurance an tuiptui loh thu leh, ASF avanga Mizoramah insurance company kohluh an har thu sawiin, Chief Minister Pu Lalduhoma'n Sorkar laipuaiah thlen in, Insurance Company hrang hrang Head Office ah lehkha a thawn avanga tun dinhmun thleng ta an nih thu a sawi bawk.

Minister chuan Mizoram chu vawksa ah a intodelh dawna a lan mek laiin kum 2021 atanga ASF leng chuan nasa takin vawkvulhtute a nuai thu leh, kha hrilen atang khan ngai an awh leh tawh loh thu te, ASF avanga vawkvulhtute sum hloh hi vaibelchhe zakua sawmruk a tlin tawh thu a sawi.

Minister chuan sawi zawmin, sorkarin animal insurance ah theihtawp a chhuah thu sawi zuiin, Animal Insurance-a State Matching Share 30% pawh 10% a tihhniamsak turin Union Minister ah a ngen thu leh Mizoram ngenna angin 10% ah tihhniamsak a nih thu a sawi a. Vawiina insurance tlangzarh tak atan hian Central atangin cheng nuai 66.49 hmuh a nih thu leh, hei hi first installment chauh niin, first instalment ah hian ran 4545 insured tum anih thu a sawi a. Sorkar chu ranvulhtute hmangaihtu anih thu leh ASF avanga tuar te tawrhpuin nan ASF chu state specific disaster ah puan anih tawh thu te, ASF tuarte zangnadawmna compensation pek thin an nih thu te a sawi bawk.

He Animal Insurance hian ranvulh hrang hrang (vawk, bawng, sial, kel, berawm) a huap dawn a. Implementing agency atan National Insurance Company Ltd thlan an ni. Premium zaa sawmpanga (15%) hi ranvulhtu ten an tum ve tur a ni a, Handholding hnuaiia progress partners te erawh chu handholding atanga tumsak vek an ni dawn thung. Vawk vulh insurance atan cheng 2000 chawi tur kha cheng 292 chauh kuthnathawktu ten an tum a ngai dawn a ni.

Animal Insurance hnuai ah hian National Insurance Co. Ltd. atangin insurance dil dan tur tlangpui leh insurance hmuh theih dan te ngaihthlak a ni a. Insurance claim hi state dang a refer ngai lovin Aizawl ah chinfel theih a nih tur thu an sawi a ni.



MHIP GEN. HQTRS

MHIP General Headquarters chuan vawiin khan Aizawl khawpui veng hrang hranga vaihlo atanga siam zuk leh hmuam (gutkha product) zawrhna dawr hrang hrangah gutkha product-te zuar tawh lo tura ngenna lehkha an sem.

MHIP General Headquarters president Lalliani chuan, gutkha product zawrhna dawr neitute leh agente chu Mizo thalaiten gutkha product an chhiatpui nasat avangin Mizorama lalut tawh lo tura an ngen dawn thu sawiin, gutkha product hi drugs kailawn a nih thu a sawi.

MHIP General Headquarters chuan dawr hrang hranga ngenna lehkha an semah hian Mizo mipuite chu gutkha product hmanga run mek an nih thu an tarlang a; gutkha product-te hian nasa takin hriselna a tichhia a, ruihhlo hlauhawm zawk tih chhohna kawng a nih thu te, MHIP chuan Mizorama gutkha product lakluh leh zawrh an do tlat thute an tarlang.

Gutkha product agent dawr lian zawng zawngte chu Mizorama la lut tawhlo turin MHIP chuan an ngen a; dawr te zawng zawng, vengtin leh khawtina mite pawh zuar tawh lo turin an ngen nghal bawh a ni.



MUHCS

Mizoram sorkar chuan nimin khan Mizoram Universal Healthcare Scheme (MUHCS) kalpuitu damdawi-inte hnenah damlo enkawlina senso rulh nan cheng vbc 9.99 a pe a; sorkar kum kal mekah MUHCS kaltlangin MUHCS zawmtu damdawi-inte hnenah damlo 83,680 enkawlina senso rulh nan cheng vbc 126.39 a pe tawh.

Mizoram State Healthcare Society (MSHCS)-in a tarlan danin, sorkar kum kal mekah nikum April thla atanga nimin January ni 9 thleng khan Mizoram sorkar chuan MUHCS zawmtu damdawi-in hrang hrang hnenah damlo enkawlina senso rulh nan tum 58 pawisa a pe tawh a, pawisa a pek chhuah tawh zawng zawng hi cheng vbc 126.39 niin, damlo 83,680-te enkawlina senso a ni.

MUHCS hi Mizorama sorkar damdawi-in zawng zawng bakah mimal/kohhran damdawi-in 16 leh private day-care centre pathumin an zawm tawh a; Mizoram pawnsah MUHCS empanelled hospital 33 leh MUHCS deemed empanelled hospital 12 a awm mek a ni.

Sorkar kum kal mek atan MUHCS-ah hian sorkar hnathawk nghet leh a nghet lo chhungkua 36,324 ziahluh an ni a; civil pensioner chhungkaw 8,733, golden card nei chhungkaw 2,22,943 leh pawisa senga inziaklut chhungkaw 20,213 an awm mek bawh.



RBI

Reserve Bank of India (RBI), Aizawl Office chuan nimin khan Financial Literacy Week (FL Week) hawna hun chu Multipurpose Hall, Thakthingah an hmang.

Kum tina an hman thin FL Week 2026 hi General Manager & Officer-in-Charge Pu T. Lhungdim chuan a hawng a. Pu T. Lhungdim chuan, RBI chuan kum 2016 atang khan mipui hnenah sum leh pai enkawl dan inzirtirna thupui bik neiin Financial Literacy Week (FLW) hi kum tin a kalpui thin tih a sawi a. Kumin thupui atan “KYC - Himna atana rahbi hmasa/ KYC-Your first step to safe banking” tih hman a nih thu leh he thupui hmang hian him taka Bank thiltihna atan ‘Know Your Customer’ (KYC) a pawimawhzia a sawi a ni.

FL Week 2026 hi Feb 9 -13 chhunga hman tur niin, hemi pual hian RBI Aizawl Office chuan nimin khan Financial Literacy Van a vailiam a. He Van hian Mizoram district pathum—Saitual, Khawzawl leh Champhai-te tlawh kualin, mipuite an awmna hmun ngeiah FL Week thupui leh sum leh pai enkawl dan chungchang zirtirna an pe dawn a ni.

